

欽定剿平粵匪方略

欽定剿平粵匪方略卷二百四十一 庚申年

五月初九日

壬寅

陝西道監察御史高士濂奏言

前此金陵逆匪東竄杭州意在分我兵力迫我分兵援浙然後悉力攻我大營爾時統兵大臣未及深思誤中賊計以致官軍節節潰退常州相繼不守今又踰無錫陷蘇州而月之閒狍猖已極策時務者莫不謂蘇州爲財賦要區又係

全浙門戶應以併力攻復蘇州爲急務臣愚以爲安慶據長江脊膂控金陵上游俯臨池州太平屏蔽江西湖北爲自古必爭之地七八年來我以全力攻賊以全力定牽掣金陵致向榮和春師久無功徒以安慶未下故也近聞曾國藩調集水陸諸軍節節布置聯營圍皖賊已援絕勢窮曾國藩又忠誠素著士卒用命皖城剋日

可復由是舉建瓚之師下偏池太直搏金陵急
攻東壩彼踞蘇之賊必回顧巢穴我援蘇之兵
卽乘勢夾攻則蘇州可復常鎮可圖而金陵之
賊計日可滅應請

旨飭下曾國藩進兵迅復安慶一俟安慶克復卽率水
陸諸軍直搏金陵急攻東壩並責令將軍瑞昌
嚴督江南江北諸軍一面防剿各路一面進攻

蘇州與曾國藩聲勢遙爲聯絡至浙江省防剿
事宜應專責撫臣王有齡認真督辦以遏賊東
竄之路奏入

上命軍機大臣傳諭曾國藩曰御史高士濂奏安慶一
城經曾國藩水陸布置聯營圍困賊已援絕勢窮剋
日可復如舉建瓴之師直擣金陵急攻東壩踞蘇之
賊必回顧巢穴卽以援蘇之兵乘勢夾攻則蘇州可

復常鎮可圖較之由長江取道赴蘇似爲便捷惟蘇常爲東南財賦之區且係數省咽喉自應急籌攻復爲上策現在賊勢已直趨杭湖勢將糜爛兩省尤爲刻不可緩曾國藩接奉前旨擬由何路行走尙未據該署督奏到如果安慶一城指日可復該署督正不妨先克安慶沿江而下乘金陵賊衆空虛之時直搗巢穴一面調派援兵併力夾攻蘇州使賊首尾不能

相顧似較便捷曾國藩旣膺重任責無旁貸其安慶
是否可以卽復金陵是否可以進攻不致牽掣兵力
久頓堅城抑或設法先解蘇常之厄均著酌量緩急
妥籌辦理

十一日甲辰曾國藩奏言自古平江南之賊必據

上游之勢建瓴而下乃能成功自金陵被陷向
榮和春等皆督軍山東面進攻原欲屏蔽蘇浙

因時制宜而屢進屢挫迄不能克金陵而轉失
蘇常非兵力之尙單實形勢之未得也今東南
決裂賊燄益張欲復蘇常南軍須從浙江而入
北岸先克安慶和州南岸先克池州蕪湖庶得
以上制下之勢臣所部萬餘人已進薄安慶城
下深溝固壘空濬長濠若一撤動則多隆阿攻
桐城之軍亦須撤回卽英山霍山防兵均須酌

退各路皆退則軍氣餒而賊氣盛不但鄂軍難以自保卽北路袁甲三翁同書各軍亦覺孤立無援是安慶一軍目前關係淮南之全局將來卽爲克復金陵之張本此臣反復籌思安慶城圍不可遽撤之實情也臣奉

恩命權制兩江必須帶兵過江駐紮南岸以固省會之人心而壯徽軍之聲援現定於十日內撥營渡

江駐紮徽州池州兩府境內擬於江之南岸分
兵三路一由池州進規蕪湖一由祁門至旌太
進圖溧陽第三路分防廣信玉山以至衢州與
張玉良王有齡就近聯絡各軍一面遣員弁回
湘添募勁勇約須七月方能到齊八月方能進
剿此臣移師皖南擬募新勇分路進剿之情形
也從前金陵大營以蘇常爲根本餉糈軍械源

源取給故能支柱數年臣今自皖南進兵應以
江西爲根本昨據安慶營中盤獲逆首陳玉城
自金陵發來僞文內稱現派賊目楊輔青李侍
賢李秀城等直取蘇常再攻徽浙以竄江西又
擬派賊目吳如哮張落刑由定遠壽潁六霍以
竄湖北兩路大舉等語蘇常已失則該逆所稱
各狡計均屬意中之事急須先事豫防湖北各

軍有官文胡林翼調度諒可無虞江西兵力單
弱實不足以禦百倍之賊必須湘南勁旅越境
協防湖南撫臣駱秉章素顧大局爲

聖主所深知賊若窺伺江西所有兵勇餉械當借資湖
南臣等往返咨商竭五六兩月之力辦江楚三
省之防仰仗

皇上威福能待兵勇漸齊布置漸定然後賊至興之力

戰所以保固江西兩湖者在此所以規復安徽
三吳者亦卽在此目今賊勢方熾人心大震但
求立腳之堅定無令逆氛之增長此臣聞賊計
大舉上犯擬先防而後剿之情形也臣才識短
絀夙乏遠略姑就近處籌畫略陳梗概其松江
等屬是否尙存蘇省文武殉難若干暨淮揚定
遠如何設法保全應俟查明熟籌陸續陳奏

曾國藩又奏言告病九南道沈葆楨前在署廣信府任內堅守郡城保全東路嗣蒙

簡任監司仍留辦防務籌兵籌餉吏畏民懷前年春石逆自撫建傾巢竄浙卒不敢直犯郡城其後李元度守廣豐玉山均因該道接濟得全其去廣信也士民遮道攀轅來臣處遞呈請留者凡十數次該道以二親年老力請告歸現當時勢艱

難聞該道雙親尙健合無仰懇

天恩飭下福建撫臣傳諭該道迅由本籍馳赴江西於
大局必有裨益至該道器識才略實堪大用臣
目中罕見其匹

曾國藩又奏言臣前調道員張運蘭一軍尙未
見到應請

飭下湖南撫臣駱秉章迅催張運蘭由湖南取道江西

至饒州一帶聽候調遣此外可徵之兵可調之
將客臣與兩湖江西督撫諸臣咨商檄調隨時
陳奏

同日胡林翼奏言臣聞戡亂必在仁賢理財必
先政事古今無不平之賊而在先求平賊之人
非常之才不可以拘牽資格修飾邊幅爲用也
臣查前任江西廣饒九南道沈葆楨識略冠時

才堪濟變其在廣信府任時賊衆數萬颯忽烏
集軍民震駭巷無居人沈葆楨登陴設守效死
不去遂以集援兵而完境土咸豐九年乞假歸
養至今廣信士民望如慈父母臣雖未與識面
官聲所播知爲奇才又浙江候補道李元度血
誠果毅志節清嚴在江西勸捐練勇轉戰建昌
廣信二府保守貴溪弋陽玉山廣豐四縣江西

浙江軍民至今稱之以上二員如蒙

恩畀以封疆藩臬之任責令籌兵籌餉必有守正不阿
之節應變無窮之略又湖南在籍四品卿銜兵
部郎中左宗棠精熟方輿曉暢兵略在湖南贊
助軍事遂以克復江西貴州廣西各府州縣之
地名滿天下謗亦隨之其剛直激烈誠不免汲
黯太懸之譏要其籌兵籌餉專精殫思心固無

他又湖南候選知縣劉蓉曾同羅澤南李續賓等帶勇立功學有本源志期遠大膽識恩威能結士心而寄軍政惟至今高臥故山不肯輕試
以上二員應請

聖明酌量器使並請

旨飭下湖南撫臣令其速在湖南募勇各六千人馳赴江西浙江皖南一帶必能補救時艱臣又訪聞

告病編修劉熙載貞介絕俗學冠時人現任順
天府府丞毛昶熙品節謹飭留心吏治降補御
史薛鳴皋德望清峻操守第一可否

特恩簡用伏乞

聖裁又聞降調御史尹耕雲胸有權略戶部郎中楊寶
臣堅忍耐苦吏部主事梅啟照任勞任怨刑部
主事范泰亨才識過人河南知縣田玉梅膽略

任戰以上八員臣均未識面亦無文字往來訪聞既確據實附陳以備

聖主採擇至現在湖北藩司嚴樹森綜理精密才勝吏事湖北安襄鄖荆道毛鴻賓好善嫉惡秉心公正總辦湖北營務兼管糧臺之戶部員外郎閻敬銘綜覈名實居心正大總理營務湖北候補道邢高魁樸誠質直遇事求實現當籌兵籌餉

急切需才 臣舉其姓名而不遽求

恩澤其應如何破格錄用因材器使之處均出自

聖裁

胡林翼又奏言查曹澍鍾本不知兵在廣西時
一無展布屢陳川省軍情自謂官民信服不過
欲脫離殘破之廣西而蒞完善之川省曹澍鍾
與臣均是丁憂人員負罪從戎尙恐難安希幸

升擢心尤可鄙況其夸詐巧滑衆皆知之川中
關繫全局臣何忍瞻徇不言昨聞成都將軍東
純行抵鄂省可否

飭催該將軍兼程前往接辦軍務並求

天恩收回曹澍鍾督辦軍務成命或於川省有裨如一
時乏人調張亮基劉長佑協勦均尙有益否則
東南旣經決裂西南復倚任非人天下事何堪

再誤臣忝膺疆寄自愧不能稱職曷敢作越俎之謀無如時局日艱生民塗炭不得已披瀝垂涕而密陳之伏懇

皇上慎簡督撫將帥必深察其心術才力聲望之實際而不輕爲嘗試保全大局天下事庶尙可爲同日曾望顏奏言查統領楚軍按察使蕭啟江統帶所部兵勇來川助剿該臬司深明韜略籌

商均合機宜所部兵勇紀律嚴明秋毫無犯竊
謂有此勁旅統帥得人方深欽慶詎意蕭啟江
忽患傷寒病證於四月二十七日身故可否仰
懇

天恩賞加巡撫升銜交部照軍營病故例從優議卹以
慰忠魂均奏入

上命軍機大臣傳諭官文曾國藩胡林翼曰曾國藩進

兵安慶已薄城下而蘇常一帶望援孔亟亦須帶兵
過江先固人心所稱平江南之賊必據上游之勢現
擬駐紮徽池境內分兵三路約須八月方能進剿通
籌全局甚合機宜卽著照所擬辦理至四川軍務緊
要胡林翼陳奏各情業經降旨令東純兼程前往署
理四川總督並令暫時接辦軍務曹澍鍾已令回籍
終制左宗棠已賞給四品京堂令其襄辦曾國藩軍

務若令督辦川省軍務能否獨當一面於大局有無裨益卽著妥速籌商如可勝任卽令該員迅赴川省一面奏聞再降諭旨沈葆楨等到後卽著會國藩胡林翼分別差委調遣蕭啟江病故其所部全軍著官文等於湖南北兩省中揀派得力大員迅速馳往四川接續管帶以資攻剿

上又命軍機大臣傳諭慶端瑞賔曰告養江西九江道

沈葆楨著慶端等卽飭迅速馳赴江西聽候曾國藩等差遣委用毋稍遲延

上又命軍機大臣傳諭駱秉章曰道員張運蘭一軍著駱秉章卽飭剋日起程由湖南取道江西至饒州一帶聽候曾國藩調遣毋得遲延紆折致誤事機候選知縣劉蓉由湖南募勇六千名馳赴江浙皖南援剿並著該撫飭令該員妥速遵辦

上又命軍機大臣傳諭東純曰曹澍鍾母孝未除令其
扶柩回籍終制川省諸軍統馭乏人著東純兼程前
進抵省後卽行兼署四川總督一應勦匪事宜均歸
東純節制該署督旣身任疆寄責無旁貸務須整飭
戎行激勵將士迅掃賊氛不得以暫時接替任令各
營將士玩忽疏懈致誤事機會望顏案尙未結束純
到川後卽傳旨令該署督交卸督篆仍在川聽候查

辦

上諭內閣曰布政使銜記名按察使蕭啟江防勦湖南等省賊匪所向克捷戰功卓著現復帶兵前赴四川助勦方期指日蕩平迅殲羣醜乃聞在營病故惻惻殊深蕭啟江著追贈巡撫銜照軍營病故例從優議卹以慰忠魂

上又諭內閣曰曹澍鍾著於行抵四川後卽扶伊母靈

樞回湖北原籍安葬毋庸辦理四川軍務

曾國藩又奏言臣蒙

恩簡署江督目下蘇常新失徧地賊氛應以兩湖爲籌

兵之源江西爲籌餉之源臣自咸豐三年至今

均係自設糧臺自辦報銷以本無地方之責也

今擬札委江西藩司接辦糧臺仍添委道府數

員幫同辦理其自咸豐三年至十年五月由臣

分作三案造冊報銷接總督印務以後卽由江西藩司衙門報銷以專責成至江西歲入之款除錢漕外專恃牙稅釐金臣現咨商撫臣毓科

倣照湖南章程牙釐另設一局遴委道府大員專管不作藩司收款復倣照湖北章程督臣撫臣分辦牙釐錢漕仍互相通融互相稽考此後江西通省錢漕應歸撫臣經收以發本省綠營

及各防兵勇之餉通省牙釐歸臣設局經收以
發出境征兵之餉似此眉目分明庶官吏各有
職守銀錢出入滴滴歸源杜絕影射浮冒諸弊
奏入得

旨戶部速議具奏

十三日

丙午

袁甲三奏言和含逆首僞春官燕糾

合賊衆竄撲滁全參將朱元興帶隊攻賊之左

都司陳廣俊等攻賊之右知府李元忠等抄截賊後李世忠親督大隊直搗中堅賊衆大潰我軍追殺十餘里斃賊千餘名生擒一百餘名奪獲槍礮器械旗幟四百餘件該逆退紮滁城西門十里外李世忠計劫賊營三座全椒城守事宜經代理知縣陳炳等布置嚴密李世忠又派遊擊李顯發帶領小隊幫同助守該逆竄擁圍

撲登時擊退斃匪多名現擬進攻定遠以分賊
勢奏入報

同日何桂清奏言現在吳江崑山又報失守浙
省自四月二十四日以後文報不通南路消息
阻絕情形甚爲可慮江北則瓜揚以下通江各
口匪船出沒無常萬福橋仙女廟一帶亦風鶴

時聞亟宜擇要扼守以防北竄前令許乃釗先
往辦理現查江蘇臬司查文經曾署漕運總督
於江北情形甚爲熟悉飭令與候補總兵曾秉
忠先帶長龍三板全幫師船趕赴高寶邵伯湖
一帶與許乃釗王夢齡喬松年暨水陸各鎮將
等會商防剿以期周密奏入

上
命軍機大臣傳諭薛煥曰據何桂清奏江北喫緊已

飭查文經與曾秉忠先帶師船往高寶邵伯湖一帶
會商防剿查文經係專辦江南糧臺之員陳欠新餉
豈能歸於無著非何桂清心已昏憤卽係該員自爲
脫身之計著薛煥迅速追回飭令清理江南糧臺事
務

何桂清又奏言據擒獲奸細姜少汀一名搜出
賊給偽印憑票供稱賊陷蘇城後派有賊黨二

萬餘人往攻吳江嘉興等處曾在吳江之勝墩
地方與皖南鎮江長貴及上游所雇礮船接仗
一晝夜官兵子藥不繼避入港汊賊遂往陷嘉
興是否再赴杭州尙不能知其先踣宜興之賊
已由長興撲湖州又欲由武康直犯杭州四月
二十六日李逆另派賊兵數千人來攻崑山次
日賊以二千餘人潛往太倉嘉定又遣一股赴

常熟一帶均圖攻占城池等語臣卽委署蘇州府知府吳雲等密赴蘇屬各村鎮激勸民團以期人自爲戰家自爲守徐圖恢復而免蔓延奏

八

命軍機大臣傳諭瑞昌王有齡曰前據王有齡奏長興失守賊竄湖州杭城危急當諭令瑞昌先顧杭州再圖進取本日據何桂清奏吳江崑山失守浙省文

報不通情形甚爲可慮並據拏獲奸細供稱嘉興失
守數日未據瑞昌王有齡奏報朕心實深懸繫著瑞
昌等卽查明嘉興失守是否確實及近日軍情如何
布置迅速具奏江長貴已抵平望因潰兵衝至遂折
回湖州據奸細供稱係打仗失利亦與王有齡所奏
不符並著據實具奏杭州嘉湖現在萬分喫緊該將
軍等務當督飭兵勇迅速堵剿並激勵各屬城鄉團

練合力殺賊毋令蔓延

何桂清又奏言候補總兵曾秉忠勇往超衆屢
著奇功軍中最爲得力其所帶長龍船員弁兵
勇前於克復九洲洲及長興縣城暨湖州府解
圍奮勇攻勦殺賊甚多勞績屢著又現在鎮江
防守之官兵日前逆匪來撲經總兵馮子材陳
國泰副將向奎等節次帶勇痛擊斃賊無算得

以力保危城厥功甚偉以上各項水陸官弁兵勇從前本極出力此時餉需短缺該弁勇猶能奮力用命尤當優予褒獎以鼓軍心

何桂清又奏言知府銜卽補同知直隸州常熟縣知縣周沐潤等稟稱江陰常熟兩縣民風素勁忠勇義憤出於自然如駕馭得力可收實用訪聞常熟團首徐浩江陰團首嚴康保等志切

同仇當卽招致會同在籍內閣學士龐鍾璐等
飭令各率所部千人相機進剿正籌辦間逆匪
連次分股犯州莊祝塘一帶嚴康保首先迎敵
徐浩接應各路沙勇鄉團同時響應斃賊千餘
人連獲勝仗餘賊潰逃團勇追殺甚衆於四月
十九日將江陰縣城收復等語所有首先進攻
尤爲出力之團首黃元昌嚴康保武生徐浩候

選千總許玉珍等仰懇

恩施逾格均准以都司用並

賞戴藍翎其該二縣辦理妥速並紳士督勦出力可否
由臣查明實在勞績另行請獎之處恭候

訓示遵行

同日魁玉奏言查鎮城古稱天塹爲南北水陸
要衝前次賊偏鎮城經巴棟阿馮子材督同副

將向奎及在城文武等晝夜嚴防四月初二日
賊犯西路沿江一帶我軍正鏖戰閒適艇師揚
帆前來沿岸轟擊賊勢漸卻追殺十餘里頗有
斬擒初六日該逆蠡擁直前於東南兩門外豎
立雲梯意圖大逞官軍槍礮齊施斃賊無算奪
獲器械甚多此固陸路官兵之力亦因水師夾
擊之功惟副將鞠耀乾管帶師船十餘隻實屬

不敷調撥應請

旨飭下李若珠酌量添調艇船駛赴瓜鎮以資厚集並
請

飭令李若珠速派勁旅分紮瓜州金山俾聲勢得以聯
絡臣不待傷痕痊可力疾馳赴鎮江添調水師
相機調度至現在守鎮水陸兵勇已一月有餘
未經領餉磬磬待哺萬難久延仰懇

天恩俯念兵艱，迅飭江南總司糧臺查文經派員卽日
來鎮辦理糧餉，以專責成。均奏入。

上命軍機大臣傳諭李若珠、喬松年曰：賊匪攻撲鎮江，
疊經兵勇會同艇師擊退。是舟師之有裨於南北兩
岸匪淺。所有吳全美艇船能否分撥瓜鎮金山一帶
停泊，以爲犄角之勢。著李若珠酌量情形相機辦理。
何桂清奏稱總兵曾秉忠所帶長龍船前於克復九

狀洲及長興縣城暨湖州解圍殺賊甚多現在防守
鎮江之總兵馮子材陳國泰副將向奎等節次擊賊
厥功甚偉所有出力之員弁兵勇著查明咨報會國
藩保奏又常熟縣知縣周沐潤會同紳士龐鍾璐等
雇募沙勇克復江陰縣城業經降旨將周沐潤及團
首黃元昌等優加獎勵其沙勇出力人員著一併查
明咨報會國藩擇尤請獎江北水師糧餉不繼著喬

松年設法接濟毋得諉卸致誤事機

上諭內閣曰常熟縣知縣周沐潤等督同各路沙勇鄉團於四月十九日將江陰縣城收復自應量予恩施知府銜卽補同知直隸州常熟縣知縣周沐潤著免補本班以知府用其尤爲出力之團首黃元昌嚴康保武生徐浩候選千總許玉珍均著以都司用並賞戴藍翎

十五日

戊申

王夢齡奏言公道橋賊股業經官兵

擊退惟菱塘橋尙有賊蹤該處在高郵對岸僅

隔一湖亟應會合揚州官兵併力合剿杜其奔

突當卽飛飭鶴齡就衡陽防兵與袁甲三派撥

藏船水陸嚴防相機進剿臣於五月初六日行

抵淮安晤前署漕

臣

聯英知己先飭總兵黃開

榜督帶藏船三十五隻駛赴菱塘橋剿辦旋據

稟稱親督遊擊張得魁等分三路進偏施放大
礮斃賊十餘名賊勢稍卻我軍排列礮船逆衆
復敢迎拒該總兵指揮各隊奮力轟擊大獲全
勝現仍設法攻剿又據揚州府知府黃欽鼎稟
報大股賊匪已向天六一帶退竄約尙有千餘
人屯踞該處幸江陰業已克復靖江解嚴裏下
河人心稍定臣甫經接篆擬略爲部署卽周厯

開

沿湖各處詳加審度庶形勢了然布置可期周
密昨准袁甲三咨稱道員徐曉峯前赴裏下河
辦理團練實爲目前當務之急臣俟該員到後
卽督率妥爲籌辦以期固結民心藉補兵力之
不足奏入報

欽定勦平粵匪方略卷二百四十二 庚申年

五月十六日酉己都興阿奏言臣行抵英山面晤

撫臣胡林翼商撥馬步各隊一面招募勇丁一
面先帶馬隊前進惟軍情萬緊祇有多隆阿撥
到黑龍江九起馬隊百餘員名舒保撥赴霍山
新調西丹官兵二百數十名臣由省挑選解馬
來楚官兵三十餘員名撫臣胡林翼營內當差

之馬隊十一名不惟人數較單且西丹官兵未經行陣長途遠勦亦未必便能得力遂復飛咨多隆阿催調吉林六起馬隊尙未見覆若馬隊稍可敷用臣擬卽繞道兼程前進雖不能獨紮

一路必先趕赴防所相機辦理至臣從前所部各隊現歸多隆阿帶領駐紮前敵勢難移動其餘各路兵勇臣未能深悉查有副將銜余際昌

所部勇丁三千有餘尙稱得力現紮霍山似可就近帶往惟刻下湖北餉項甚形支絀難期源源接濟請

旨飭下喬松年隨時協濟方可無虞匱乏

同日李若珠奏言查陳家集敗回賊匪糾黨復由僧道橋繞竄菱塘橋一帶於高郵湖口修築土圍餘皆散住各村以圖窺伺經臣派參將石

皓督帶礮船輪流轟擊五月初一二等日復會
同高郵州襄輔所帶漁網船四十餘號並民團
練勇各帶噴筒火箭徑撲賊營該逆立腳不住
旋將營內帳房燃著延燒子藥火燄衝天焚死
無數立將湖口土圍全行踏燬斬獲首級一百
餘顆生擒二十餘名總兵陳國泰在東溝一帶
見有賊船數十號連檣下駛意欲窺撲水營力

圖下竄斷我瓜鎮江路當卽統帶所部師船偏
近賊營輪開大礮斃賊不計其數將岸上賊卡
盡行燒燬江陰之賊相率遁去北岸似覺稍鬆
一俟吳全美師船東下安勇鶴齡等軍到後卽
可會合揚防兵勇併力進攻與袁甲三聲勢聯
絡合成一氣清淮裏下河各處皆可無虞至鎮
城一軍與各起艇師南臺應解口糧絕無影響

其在仙女鎮招集之二千餘人北臺應籌之款
項亦無端倪仰求

聖恩飭令統歸喬松年經理以免推延其薛成良裁撤
一軍八千餘人空糧並可照數招募以資攻勦
同日兼署江甯將軍京口副都統巴棟阿奏言
現在無錫蘇州相繼失陷東南大局決裂江面
水師自儀徵至江陰等處皆有艇船節節分防

勇所餘口糧接濟都興阿一軍鎮江在事文武官弁
兵勇奮勇擊賊力解城圍深堪嘉尚著巴棟阿查明
尤爲出力各員奏請獎勵

上又命軍機大臣傳諭薛煥曰蘇常失陷鎮江爲南北
咽喉自應扼要嚴防以杜賊匪北竄所有水陸兵勇
應支餉需據該副都統派撥艇船繞赴上海僅領銀
五萬兩現當防剿喫緊之際各營待餉孔殷著薛煥

籌辦兵米迅速遴委委員帶赴江北糧臺或於泰州城內分設糧臺專放鎮防水陸各營軍餉及大江水師餉糈以便就近支領毋稍延誤輪船入江較艇船爲靈便著薛煥卽飭吳煦將前在鎮防之商捐輪船二隻調赴鎮江聽候巴棟阿調遣以資防剿

同日張芾奏言查溇安一城爲徽浙往來要隘自失守後徽河阻塞商賈不通將成坐困之勢

經臣函商總兵饒廷選剋期會擊並飭副將王夢麟等步步進逼迅圖攻克饒廷選飭知府彭斯舉等分路薄城王夢麟等各率所部密約會師齊進該逆卽由北門靈溪一路竄遁當於四月二十二日將縣城克復王夢麟等恐賊由僻徑竄入徽境卽刻回軍堵截賊遂竄至徽州南九十里之山陽坑臣先飭已革副將羅承勳馳

往堵禦又令同知吳修鼓策應守備程紹鸞由
威坪折回禦賊於水竹坑王夢麟等亦先後趕
到賊遂越水嶺竄往績溪之大石門臣飛飭駐
守叢山關之已革同知羅仲山併力遏賊以杜
竄入甯國縣之路賊乃折回南趨羅仲山初敗
賊於楊溪守備汪勝徽再敗賊於十里巖各鄉
民團聞風響應沿途追殺繳級獻功者紛至賊

遂由觀音堂竄旌德縣之白沙署知縣李焜會
同翰林院侍讀呂錦文率團迎擊巡檢羅金鏞
戰歿賊遂略旌境而踰黃華嶺屬聚於太平縣
之甘棠地方難保不再圖內犯臣復飛調王夢
麟等出竊嶺以爲後應仍督飭各軍進勦甘棠
倡令併入青陽貴池一路庶內防得以稍紓亦
可分兵赴浙蘇援應其接仗陣亡之巡檢羅金

鋪應請

旨飭部從優議卹奏入

上諭內閣曰逆匪竄踞浙江之淳安縣城官軍疊次進擊獲勝於四月二十二日將縣城克復該逆由僻徑竄至徽州南鄉復向績溪等處竄至旌德縣之白沙地方踰黃華嶺至太平縣境著張芾仍飭各軍迅速進剿毋令久踞蔓延其接仗陣亡之巡檢羅金鏞著

交部從優議卹

張芾又奏言浙江自克復追安後衢嚴均已解嚴似可無須留兵現聞吳江失守賊勢趨重嘉湖江長貴以兵力單薄退至塘棲道員蕭翰慶由廣德取道湖州中途聞長興失守湖州危急遂揮軍衝突欲達郡城扼守血戰一晝夜會大雨如注前隊已衝過賊險蕭翰慶率親軍數百

人斷後與遊擊吳修攷都司鄧茂先在距郡二十里地方力戰陣亡其前隊抵湖州者有三千餘人尙能成軍仍協同戰守現聞湖州解圍長興亦已收復如能以各路援師併紮嘉興不至驟然決裂臣俟將太平縣境內竄匪擊退兵力較易騰挪卽再調撥隊伍馳往策應並咨會已革提督周天受會同已革總兵米興朝力扼廣

建要隘仍籌撥軍火兼程解浙應用一面函請
新署督臣曾國藩由徽州進發較爲便捷奏入
上諭內閣曰道銜儘先知府蕭翰慶由楚軍分撥帶勇
赴援徽甯等處疊著戰功茲復進援浙境血戰捐軀
殊堪憫惜著與吳修攷鄧茂先一併交部從優議卹
十七日庚戌喬松年奏言竊維鄉勇者卽本鄉土
著之人如曾國藩所帶之勇猶是古人遺意故

所向有功至他營所募之勇皆各省亡命不逞
之徒本無身家未聞禮教管帶官果清廉嚴明
稍可繩之以法若關冗貪黷則更不能管束是
以風氣日壞況應募之人不辨良莠卽有賊匪
薙髮來充無從覺察所以蘇城失守勇皆變賊
人徒恨勇之通賊不知賊早冒勇而來暗相勾
結官不及知今聞勇丁投賊者極多誠恐新派

統兵大臣到此調兵不及仍作募勇之舉則投
賊之勇重出應募而賊匪故智又將復施是禍
根不拔難望成功惟兵丁不可不豫爲調派此
時健銳火器兩營不便遠調或卽調派護軍營
暨北五省之綠營令其陸續馳赴江北江南交
新授統兵大臣布置此項兵丁縱或不能驍勇
斷不至勾通賊匪反爲賊用如因各省綠營征

調太多恐致空虛不妨將調出之兵若干照數
補足雖似多添兵額而較之大營添勇其數亦
適相當至征兵必有隨營餘丁現在出征之營
傷亡不少餘丁早已補盡每以外省之人充補
亦係游民與勇無異應請嗣後兵營如餘丁多
已補兵卽令其行文本營在本籍補挑起送到
營不准以彼省之人充此省之兵於營制更爲

有益奏八

上命軍機大臣傳諭曾國藩瑞昌巴棟阿李若珠薛煥
王有齡曰現在江南北兵額不敷急須增補京營及
北五省兵丁驟難調撥著曾國藩瑞昌巴棟阿李若
珠薛煥王有齡等通籌辦理如該營餘丁多已補盡
卽將所出兵缺行文該省督撫在本籍補挑精壯起
送到營其路途資斧官爲籌給不准以彼省之人充

此省之兵以重營制而資得力至招募勇丁本多流弊如曾國藩所帶之勇俱係土著始能所向有功若以烏合之衆漫無紀律無事則虛糜糧餉有事則臨陣潰逃殊爲可恨現在江南潰勇多已投賊著薛煥卽飭糧臺查明開除不准冒領賞卹及資遣回籍等項銀兩其現存之勇如係無業游民打仗不能得力者卽著嚴行裁汰查有投賊之勇薙髮再出應募者

卽行正法以肅軍律

上又命軍機大臣傳諭都興阿曰江南大營所募各勇多係無籍游民平時不守紀律臨陣輒行潰散甚或紛紛投賊流弊不可勝言已諭令江蘇浙江各督撫並帶兵各員分別裁遣向來楚省鄉勇多係土著良民勦匪頗稱得力昨據都興阿奏馳抵英山調撥馬隊並會商胡林翼調取余際昌勇丁三千餘名此項

勇丁或能如數調到或由楚另行添募著都興阿妥爲擇選務須土著有籍者方可令其入伍斷不可以無業游民濫行充數致貽無窮之患

喬松年又奏言查江北糧臺總督並未嘗顧及但聽辦理糧臺者之自爲計今年外省協餉山東陝西雖未解足尙在趕解山西自正月至四月連閏共五箇月較去年已少解銀二萬四千

兩河南屢經奉

旨飭催竟無絲毫起解且各處勸捐抽釐委員甚多人
自爲政糧臺不能過問臣輾轉思維若得

欽派大臣督辦糧臺則事權不至旁撓籌畫可期有效
合無仰懇

天恩准照江南糧臺特交督撫一人督辦江北糧臺事
務或另行

簡派部院大臣庶呼應較靈而措施亦易奏入

上諭內閣曰江北糧臺事務著王夢齡督同喬松年辦

理

同日戶部奏言臣等遵查署兩江總督曾國藩所奏清釐奏銷籌備兵餉劃清界限設局分管擬請卽如所奏辦理惟該署督自辦奏銷以來迄今並無一案報部恐耽延日久數目紛繁難

免轆轤不清且江省歲收牙稅未據該撫咨報
有案釐金一項該省早已設局抽收亦未將收
支數目聲明到部今該署督請另設牙釐一局
派員專管事方經始自當接算一清應請

飭令署兩江總督迅將行營糧臺自行奏報各款分案
報銷並會同江西巡撫將該省向來收過牙釐
款項先行截清數目送部查覈奏入

上諭內閣曰署兩江總督曾國藩現在督兵進剿所有該署督糧臺卽著札令江西布政使總辦再派道府數員幫同辦理由江西報銷並准其將江西錢漕倣照湖北章程歸巡撫經收以充本省兵餉其通省牙稅釐金亦准其照湖南章程另設一局由該署督自行經收以充征兵餉需仍應彼此互相通融稽考毋令稍滋流弊至該署督前次帶兵所設行營糧臺尙

未報銷著卽分案造報免致膠轕江西牙稅釐金自
設局以來收支數目亦未報部著曾國藩會同江西
巡撫將前收款項先行截清數目造報以清款目而
免牽混

十八日 辛亥 瑞昌王有齡奏言據廣西提臣張玉

良咨稱常州無錫相繼失陷後蘇城又已失守
和春因傷身故張國樑尙無下落潰散兵勇經

理乏人如有意外之虞更難收拾不得已暫且
偷生以期重振軍威無如僅有原部小隊三百
餘名馬德昭隨帶兵勇三百餘名兵力過於單
薄卽擬扼紮吳江平望亦屬不能惟有沿途收
集趕赴浙江配齊軍火再圖進剿於四月十四
日晚間抵浙潰勇已集城外卽嚴飭官弁各收
各隊並晤商巡撫籌給銀米軍心賴以安定惟

挽回無術獨力難支以致屢失地方咎有應得
請卽轉奏嚴加治罪一俟收齊各軍卽督大隊
由嘉興平望會同江長貴進攻蘇州並囑米興
朝蕭翰慶進攻宜興溧陽周天受進攻高淳東
壩曾秉忠督帶長龍礮船由太湖進剿無錫以
牽賊勢使其首尾不能兼顧我軍得早復各城
等語臣等查張玉良本無統兵之責自蘇常失

守浙垣震動賴該提督分別收集軍民始得稍
安應卽責令保守浙疆一面相機前進以圖規
復其自請嚴加治罪之處恭候

聖裁奏入

上命軍機大臣傳諭瑞昌王有齡曰張玉良自常州至
無錫蘇州節節敗退前經降旨將其革職留任因該
提督未知命其總統諸軍情尙可原所請治罪之處

著加恩寬免張玉良前次援救浙江頗爲神速此時
旣知愧奮卽著親督大隊由嘉興平望進攻蘇州迅
圖克復以贖前愆江長貴因傷退回瑞昌等應添官
軍協同張玉良進規蘇郡卽以自固嘉湖藩籬所調
各軍均可酌派赴蘇不可株守杭城致蹈從前覆轍
杭城情形喫緊張玉良旣督隊先行瑞昌起程不妨
稍緩江西福建赴援各兵勇計日亦當到杭著瑞昌

王有齡分撥出省以勦爲防

瑞昌王有齡又奏言前任兵部右侍郎戴熙在籍團練辦理協防局務勤能公正勞怨不辭本年二月賊偪省城卽會督在省文武商辦城守事宜晝夜宣勤心力交瘁二十七日城陷復與將軍密籌堵禦一面雇募義民分投截勦並親寫書函乘閒投赴總統張玉良大營求救至二

十九日賊氛愈熾萬不能支從容投水自盡其
弟附貢生戴煦外甥候選訓導王朝榮及媳金
氏同時殉難臣等查該侍郎公忠自矢力竭捐
軀洵屬無忝臣節且其弟及媳與甥俱各同時
殉節尤見忠義萃集一門仰懇

聖恩賜諡優卹並於錢塘原籍建立專祠准令伊弟戴
煦等一併附祀以彰節義奏入

上諭內閣曰前任兵部右侍郎戴熙在浙江本籍辦理團練及協防局務殫精竭慮任怨任勞本年二月間賊擾省城與該將軍力籌堵剿勤勞晝夜公爾忘私嗣於城陷後從容盡節悼惜殊深著加恩追贈尚書銜照尚書例賜卹任內一切處分悉予開復應得卹典該衙門察例具奏並在錢塘縣本籍建立專祠伊弟附貢生戴煦媳金氏甥候選訓導王朝榮同時殉

難均著交部分別旌卹並准其一併附祀以示朕篤
念忠藎至意

王有齡又奏言據廣西提督張玉良咨稱江南
提督張國樑於本年閏三月閒在丹陽東門外
督隊攻剿自辰至未鏖戰多時忽被該逆四面
包抄力竭不支人馬同時陣亡令箭印信均無
著落張國樑效命疆場致身爲

國歷數年如一日臣前在江蘇稔知其謀勇超羣
與士卒同甘苦身經數百仗戰勝攻克無一虛
發之師偉功疊著

懋賞屢膺茲以鏖戰力竭臨陣捐軀實堪痛惜應如何
從優賜卹以慰忠魂之處出自

聖裁奏入

上諭曰仍應訪查實在下落如尙未亡或遇救得生猶

堪備干城之選

十九日

壬子

掌廣東道監察御史陳濬奏言蘇州

省城失陷巡撫徐有壬殉難署布政使蔡映斗
署蘇州府知府吳雲署元和縣知縣馮樹勳均
已逃出夫失陷城寨律有明文前咸豐二年湖
南岳州府失守知府廉昌以棄城伏法三年安
徽桐城縣失守按察使張熙宇亦以退避伏法

所失止於一郡一縣而法如此之嚴者誠以勵
臣節而固人心有不得不然者也今蔡映斗任
重藩條吳雲位崇郡伯較之廉昌張熙宇殆有
甚焉該員等現已奉

旨查辦第恐外省狃瞻徇之習仍復曲爲開脫使之帶
罪自效以爲開復地步身家旣已無恙官爵亦
可再求勢必紛紛效尤咸懷避賊偷生之計賞

濫罰輕則人視賊爲奇貨必反以軍務未平爲幸此不可不深慮也奏入

上諭內閣曰蔡映斗馮樹勳均著拏問交薛煥嚴行審訊按軍律定擬具奏吳雲著先行革職如查無札委卽行拏問審辦以肅法紀而儆官邪再浙江已革臬司段光清前因該員縋城潛逃疊經嚴降諭旨令王有齡拏問審辦現在該革員尙在帶兵著該撫仍遵

前旨拏問與已革副將王邦慶均從嚴懲辦毋稍寬縱

二十日

癸丑

鴻臚寺少卿曹毓瑛奏言江南自大

營潰退曾未弔月蘇常繼陷近復吳江失守浙江省城震動都興阿擬自英山由豫繞赴徐宿以達江北而曾國藩通籌方略擬分三路進剿先酌帶楚兵駐紮徽州俟新勇到齊大舉此皆

持重之見審於形勢而出於不得已也然都興
阿由豫以抵江北程途紆遠非兩月不能到浙
江自蕭翰慶陣亡江長貴由平望退守銳氣盡
銷亦無足恃臣愚以爲都興阿帶兵自英霍取
道臨鳳以抵江北不過旬日可至卽由通泰渡
江直抵江陰進攻常州無錫爲一路而以周沐
潤所募沙勇副之鎮江現有兵萬餘名巴棟阿

馮子材向奎進規丹陽爲一路薛煥在上海捐資添募勇丁萬人由嘉定太倉崑山進攻蘇州爲一路而以張玉良出嘉興平望之師副之曾國藩率楚兵由甯國取道廣德進抵嘉湖爲一路以策應諸軍而令米興朝攻宜興溧陽周天受攻高淳東壩曾秉忠督長龍船進至太湖以副之攻賊所必救賊將聞風回顧據賊所必爭

賊亦知難而退東南大局尙有可爲然後俟會
國藩新募之勇到齊分路進剿庶於事有濟而
江浙不至悉遭蹂躪

曹毓瑛又奏言江南大營決裂至此者由於分
兵援浙而浙省之所以被陷則以徽甯等防任
賊長驅而張芾周天受不爲之堵禦也徽甯爲
江浙門戶竭浙江全省之力數年供應一旦賊

集賢堂
三
至如入無人之境臣知我

皇上洞鑒張芾周天受之貽誤而一時未遽罷斥者特以該處離金陵較遠不得不暫留統帶惟現在曾國藩將抵徽州徽甯爲兩江所兼轄曾國藩所帶之兵僅有萬名而該處除分撥援浙外尙有三萬餘名主客之勢輕重不侔於行軍殊多窒礙可否將徽甯軍營兵勇統歸曾國藩節制

並

飭查明虛冒裁汰老弱以清宿弊曾國藩得此重兵卽
可簡其精銳進剿蘇常不至俟新募之勇曠日
持久而後成功於東南大局不無裨益奏入

上命軍機大臣傳諭都興阿曰皖省自克復鳳陽府縣
兩城後廬定雖尙爲賊踞英霍六一帶業已疏通該
將軍若取道廬鳳前進袁甲三現在駐紮臨淮尙可

集賢堂
會商防勦機宜聯絡聲勢儘由豫繞赴程途未免紆
遠江北久無統帥賊匪時圖竄擾裏下河等處必得
威望素著之大員迅速馳赴方可力遏賊氛著都興
阿酌量情形卽由臨鳳馳抵江北帶兵追勦以免遲
誤

同日

上命軍機大臣傳諭曾國藩曰前據曾國藩奏剋期渡

江俟兵勇到齊卽分三路進兵當經諭令照擬辦理
因思將來由池州蕪湖進取金陵必須水陸兼籌方
能得力所有楊載福彭玉麟水師均著歸曾國藩調
遣卽飭令該提督等師船聯爲一氣進攻沿江賊巢
以牽賊勢而壯聲威

二十一日

甲寅

楊載福奏言

臣

督帶水師及親兵

各營駛過安慶次李陽河有殷家匯對河逆賊

負嵎死拒池州又出大股來援參將丁泗濱等
急攻池城援賊當卽退回而青陽賊援屬至都
司章志俊等帶隊渡港由青陽大路迎擊復督
同薛金榜等分隊繼進斬擒多名援賊敗退壘
賊伺章軍追殺漸遠乘虛出撲總兵李成謀參
將劉德亮各派三板衝過賊巢開礮轟斃百餘
名溺斃無數過港之賊俱經章軍全數擒獲李

成謀等乘勢攻壘諸軍一鼓齊進賊始出壘奔竄殺斃及墮濠溺斃數百名餘賊向池州大路狂奔掩殺二十餘里計共斃賊一千數百名生擒僞承天福等賊目一百三十七名奪獲擡槍鳥槍旗幟刀矛數百件羸馬百餘匹當將殷家匯賊壘剗平進次池州令韋志俊等隊紮北門外臣自督親兵六營礮船進攻東門石壘劉德

亮等督軍奪卡緣牆斬關而入賊向城內回奔
我軍趕殺斃賊甚多當將石壘平毀並焚東門
外房屋淨盡連日各營環攻四門該逆踞城不
下臣以危城孤立終無不拔之理遂盡撤攻池
水陸各軍渡江出賊不意以襲縱陽乃併力攻
擊竟無隙可乘惟陸師破卡一座臣相度情形
派參將何瑞祥等督勇由外港將羅塘洲橫腰

開挖水道一條又派李成謀等率勇挖斷下首
隄埂引水澆入後湖我軍水陸並攻逆衆傷亡
過半韋志俊偪攻城下該逆窮蹙已極獻城乞
降當將逆首萬棕勝等正法釋其黨與分別遣
散所有縱陽僞城及石壘一律埽平其出力及
陣亡員弁仰懇

恩施分別獎卹奏入

上諭內閣曰殷家匯賊巢樅陽僞城一律埽平勦辦尙
爲得手仍著楊載福乘此聲威督同各軍迅克池州
以圖進取所有出力總兵李成謀著賞加提督銜參
將丁泗濱著以副將遇缺推補並賞給精勇巴圖魯
名號都司韋志俊著以遊擊卽選祝廣元薛金榜均
著以守備卽選並賞戴藍翎韋以琳尹昌景均著以
千總拔補並賞加守備銜賞戴藍翎其餘在事出力

員弁著楊載福擇尤酌保副將銜水師參將劉德亮
屢立戰功中礮陣亡殊堪憫惜著照總兵例議卹